

道光庚寅重修

南宮縣志

第七冊

本衙藏板

河北省南宮市文化遺產
南宮市國家檔案館翻印



南宮縣志卷十四

藝文志

後編上

疏

計典屆期敬陳愚見疏

明太僕

寺卿

李文熙

邑人

奏爲計典屆期敬陳愚見懇乞聖明采擇以肅吏治以安
民生事我國家繼天立極稽古定制凡天下藩臬之長郡
邑之吏三載一朝卽虞廷黜陟幽明遺意至鉅典也明歲
萬歷二十三年復值大察之期恭遇我皇上天授英明勵
精化理綜核吏治一時輔臣部院共期秉公持衡仰承德
意則今之計典視昔益加益矣臣復何言但恬熙旣久法

或涉于因循偷惰漸成人易流于姑息謹稽已試之規謬
附一得之見條陳五事綴以數詞儻有擇于芻蕘庶少申
乎芹曝伏乞聖明垂聽焉一曰覈實政以辨人品夫人才
難知自古記之矣有務實勝者是謂真才有務名勝者是
謂似才此人品誠僞之辨不可不察也今天下有司本實
心以行實政者不可謂無人矣亦有大謬不然者卑悶悶
爲無足奇務皎皎以博上考勤于簿書期會爲給焉爾矣
嚴于催辦公賦爲捷焉爾矣工于奔走承順爲通焉爾矣
有以勸課農桑爲務者乎有以招撫流亡爲心者乎有以
興起教化爲事者乎誠愨純一之念寡而馳騫速化之術

多無惑乎吏治日敝而民生滋病也儻采名不采實則巧宦者進而惻惻者退矣伏乞勅下該部轉行各撫按等官查照須知憲綱所載切于民事者考覈屬吏勿襲虛文惟崇實政僞增戶口如王成者務有以察其奸催科政拙如陽城者必有以稽其實斯上以實求下以實應而吏治其蒸蒸乎一曰禁科斂以肅官箴夫朝廷置親民之吏所以計安元元而易海內也政貪則民殘政清則民安我皇上軫恤民瘼科斂有禁法令非不森嚴矣天下有司宜潔己愛民仰副聖主之休命可也第承平日久怠玩成風奉公守法者固多而貪婪自恣者亦不盡無也剝民之膏脂以

充已之囊橐有額外加徵而累及里甲者有夫馬幫貼而累及各役者有不償貨價而累及鋪行者且濫受民詞以利贖鍰之入而不登報上司者弁髦明禁大肆侵漁之術蔑視三尺期盈豁壑之慾心類穿窬行同市井是未入觀之先而民之財力已竭矣若不預爲禁治其蠹國害民可勝道哉伏乞勅下各處撫按嚴加申飭曉諭所屬官員不許指稱朝覲科斂小民仍密加查訪如有貪黷顯著者或徑自拏問或參奏重究庶有司懾于法而不敢犯地方亦可以少寧矣一日秉公心以定官評夫撫按承簡命之重統馭一方則知人最要矣然握風紀之司秉公持正廣詢

博訪且相臨旣久聞見頗詳其甄別精確者固衆也其間或徇愛憎爲臧否或任耳目爲取舍狼貪狙擊巧事逢迎者譽言日至誠心彊項違忤時好者毀言日集苛責于銅墨而優容于旬宣嚴刻于疏逖而寬假于貴近深求于離職而姑息于見任故吏部憑考語之優劣爲考察之殿最誠不可不慎也伏乞勅下該部轉行各處撫按毋搖于羣誹毋惑于衆好毋徒眩乎聲名毋盡拘于資格毋以小失掩其大節毋以一事概其生平輿論允協無嫌于尙同己見獨真不妨于偶異庶甄別攸當羣工競勸矣一日禁餽遺以清仕路夫國家之敗由官邪也官之失德寵賂章也

我皇上洞察吏弊嚴禁饋遺不啻三令五申矣在外大小臣工直已守道者固多有之而夤緣干進者未必無也故當朝覲之期營鑽多方仰二天之庇則潛通苞苴甘媚竈之卑則公行賄賂企遷轉者假雉羔以爲汲引之階慮擯斥者託錢神以爲倖免之計正直風微廉耻道喪若不嚴爲之禁世道何由而清明百官何由而風勵哉伏乞勅下該部嚴爲禁約仍勅廠衛緝事衙門并五城兵馬于京城內外密加體訪有饋送貨賂私通關節者卽便拏送法司科道仍不時查參庶法令森嚴人心震懼雖有神奸無所售其計矣仕路其澄清乎一日杜私謁以挽頽風夫計吏

之典將以進賢退不肖也必採諸輿論而不流于偏聽斯黜陟明而勸戒昭矣邇來士風漸澆雌黃任意黑白變更工排擠則爲落井下石之計肆媒孽則構萋菲貝錦之謀情屬眦睚雖嚴如鷹鷂者加以鸞鳳之名一中睚眦雖清擬冰雪者目爲搏掩之黨或投匿名之帖或遞告訐之文或假公道以快私情或借權勢以報宿怨致使妍媸莫辨玉石俱焚此風一倡人皆效尤君子重足小人攘臂矣豈聖世所宜有哉伏乞勅下該部務秉公正之心痛釐積習之弊考其素履不惑于浮言核其實跡不眩于逸口惟以賢否爲進退毋信毀譽爲去畱庶公道昭明而衆志咸孚

矣夫此五者雖書生恒言而課吏要務或不越此顧力行何如耳誠能兼舉不偏則法令嚴明而百官承式夙弊盡革而萬民乂安太平之效可立致矣伏乞勅下該部再加酌議如果臣言不謬俯賜施行則生民幸甚臣愚幸甚臣不勝戰慄待命之至

矜宥諫臣以開言路疏

李文熙

奏爲懇乞天恩矜宥諫臣以開言路以光聖德事頃閱邸報該福建道御史冀體爲論輔臣趙志皋奉旨回話蒙賜降調旋以臺省伸救斥爲編氓又該南京戶科給事中任彥葉爲救文選司郎中馮生虞奉聖諭任彥葉降一級馮

生虞等降罰有差臣等聞之不勝駭愕夫二臣感時觸事
抗疏冒瀆未能仰契宸衷且意涉急遽詞失婉曲上千聖
怒譴謫示懲固其自取更復何辭臣等濫厠畱臺不能默
默者誠有見於朝廷之言路關係治道匪細耳恭惟我祖
宗設官分職兩京並置六科十三道寄以耳目之責凡時
政得失百官邪正皆盡言無諱所以廣聰明而防壅蔽也
使依阿唯諾國家何賴焉今冀體任彥蘖俱有獻替之司
因事納忠本其職分非出位妄言者比言有可采固俯賜
俞允詞或逆耳當曲爲包容且體以大義而責備乎志皋
明臣道也生虞因推賢被譴而彥蘖救之實愛惜人才之

忱耳要之皆爲社稷計也非爲身家計也若曰假此以市恩結黨_臣等知其必不敢矣昔人謂主聖則臣直又謂君仁則臣直朝有諍臣而皇上之仁聖益彰乃不諒其譽謬之忠而責以瀆激之罪白簡甫陳謫譴隨加皇上設立臺諫之意謂何培植賢才之意謂何而遂一鳴輒斥耶由是天下之人見二臣以言獲罪也必將曰清明之朝且諱言如此聖明之主且拒諫如此二臣無負於朝廷而顧不能容如此其爲盛德之累多矣古之諫官言及乘輿天子改容事關廊廟宰相待罪故聖帝明王稽衆舍己未嘗罪一言者所以養天下敢言之氣而折奸邪之萌也今惴惴款

款者立見斥逐此風一長自非仗節慷慨之臣幾何不爲
利害所怵天下中才最多鑒二臣之覆轍將以言爲戒緘
口結舌甘效寒蟬豈敢明目張膽批鱗折檻以身試不測
之威而賈其罪耶異日脫有大奸巨蠹陛下深居九重何
由而知之直諫骨鯁之士遠憚夫壬人乘隙而進讜議不
聞而國是日非將來壅蔽之患有不可勝言者此豈人主
之利社稷之福哉臣等非止爲二臣惜也爲言官惜也非
止爲言官惜也爲國家大體惜也伏乞皇上廓天地之量
霽雷霆之威念育才之甚難思建言之不易收回成命將
冀體任彥蘂照舊供職併馮生虞令復原職仍願自今以

往不復以言罪諫官庶幾開天下忠義之門豈惟體等感恩圖報內外大小臣工靡不思罄涓埃皇上德業之盛名譽之美真可以增光祖宗媲美帝王而億萬年無疆之慶端在茲矣宗社幸甚天下幸甚臣等干冒天威不勝悚慄祈懇之至

敬陳科場之積弊疏

本朝御
史鄭惟孜巴人

題爲敬陳科場之積弊亟請廓清維新風氣事竊惟國家之官人最重科目而科目之得士全係簾官不特爲主司者期於公明卽凡有職掌者皆宜清慎伏見我

朝開科以來士風丕變

皇上加意右文科目所得才品學問爲名公卿者指不勝屈雲
漢作人不盛於此也但法久弊生有必宜清釐者今年又
當鄉試敢爲我

皇上獻一得焉一同考官宜先考試也場中較文同考官是賴
若不預加考試但臨期闕定則荒昧者僥倖分房真才能
免沉抑乎請嗣後各省應分房者不許一人規避皆限七
月廿旬到齊監臨提調官與學臣及方面進士官一二員
公同擬題四書長題短題各數十道五經題各數十道各
題闕出一道使作題說一篇某題書理語氣云何文有幾
格某格云何經書三說俱通入內簾通二說者補數餘俱

執事外簾至所考題說俱解部磨勘若不通者見取通者見遺卽行議處至順天亦照各省例同科道官一二員考取則荒昧者不得濫與大典矣一皿字貝字宜一體較閱也順天首善之地貝字號卷自宜細心評點方仰副我

皇上惠此京師至意邇來房官於南皿文雖不通亦謬加圈點讚揚北皿猶稍爲點次至貝字但於前場文首尾加一二點而已文卽果不合式其評語與文亦多刺謬蓋南北監生皆候榜發江浙走名之士又多交結公卿主司情弊十知七八旣不中其文矣不曲爲慰藉則謗議沸騰將恐敗露若生員大半貧士場竣卽歸閒有候曉者亦迂拙不足

多畏故敢草率評點也請嗣後無論皿字貝字一槩秉公細爲校閱落卷發至順天府許科道公同查勘如有仍前不公南卷謬加圈讚北卷草率了事者指名題參照例議處則房官無所容其私矣一收掌官不宜論俸預定也文武會試內收掌官例用內閣中書俸最深者中書科俸最淺者半年前人皆知其作收掌也爭以關節託之其人亦公然招搖包攬一入闈中得以相機查送百無一失此弊之尤甚者也請嗣後無論俸次盡行開列恭候

皇上欽點南北人各一名使互相防察則人不知誰當入簾而關節之大實可塞矣緣條陳科場事宜字多逾格如果

臣